

所在

——黃明峯臺語現代詩選

第二輯 暗光鳥

日曜日式散步者

芳味

雨的細節

拋荒的情批

四季

我會記得

海湧

暗光鳥

時間

所在

日曜日式散步者¹

我的頭殼

予火車佻公車載到臺中美術館落車
七月時的大日頭臨臨仔²拍破我的烏目鏡
當當³回神欲翕⁴一張家己的相
昨眠掠入去筆記內的一寡夢境
雄雄對我的 kha báng⁵拍交落
一隻安達魯之犬跳出來
旋入去有冷氣的展覽場內底

(日曜日式散步者佇燒烘烘的中晝
熱天的中晝是臺南運河邊的玉蘭花
愛唱歌的玉蘭花是水蔭萍的詩句
孤單的詩句是古倫比亞留聲機的音樂聲
古早味的音樂聲是壁角思考的一杯冰紅茶
漸漸退冰的紅茶是茉莉牌薰煙中的表情
苦悶的表情是包廂內寂寞的人影
一條長長的人影是日曜日式散步者)

我的身軀

佻半粒蘋果的早頓佻早起的一頂帽仔
綴著火燒的心情走揣有刺激性的幸福
當做是一擺波西米亞人的放浪
關於藝術佻超現實關於風車佻森永喫茶店

¹ 寫佇「共時的星叢：風車詩社佻跨界域藝術時代」展覽觀後，展覽期間 2019/06/29-2019/09/15，國美館。

² 臨臨仔：lím-lím--á，差一點點。

³ 當當：tng-tang，正當。

⁴ 翕：hip，照相、拍照。

⁵ kha báng：皮包、文件箱、手提包。

親像學習一隻蜂仔按怎予蘋果樹感冒
親像了解一對彩色的翼股按怎變成
驚死人的捲螺仔風

(日曜日式散步者佇咖啡芳氣的下晡
閒仙仙的下晡是一條長長的人影
烏烏的人影背後是沉重的數念
日常的數念是弓蕉園的風
甜甜的風是大細聲的喝咻
黃金色的喝咻是夢中的想法
反對想法的想法是自由的靈魂
鮮沢⁶的靈魂是日曜日式散步者)

我的心思
掛佇壁面、藏佇冊中、囿佇玻璃櫥仔內
我的家庭、福爾摩沙島影、釋迦出山
夫人相、白色的空間、臺灣舞曲
自畫相、小小的祕密、臨床講義
色水、角度、清醒的耳空恰目矚
彼隻失蹤的安達魯之犬
已經跳入去壁面的影片當中

(日曜日式散步者佇恬靜的暗暝
暗暝的落雨聲是文學的 LE MOULIN
LE MOULIN 的歷史是閃爍的星光
天頂的星光是過去到未來唱袂煞的歌
無仝款的歌是曠闊的海
闊莽莽的海是另外一種可能
可能是時代的一種反抗一種姿勢
反抗的姿勢是日曜日式散步者)

⁶ 鮮沢：tshinn-tshioh，新鮮有光澤。

芳味

時間

袂輸是眼前飛過的燕子

目一瞞

隨無看見

心情

敢若是昨暝的眠夢

茫茫渺渺

講無路來

狡怪的霧霧

一個人

恰二三句躊躇的詩

綴著春天的跂步

行踏公園

轉斡⁷的時

無張持拄著一陣芳味

彼は風中的花影

抑是記持中

毋甘放揀的

你的長頭髮

⁷ 轉斡：trng-uat，轉彎。

雨的細節

1.

世界開始思考
家己的目屎
為何予人捆縛牢咧

家己的目屎
按怎有機會
會使自由自在
滴落來

2.

春夏秋冬相連繼
飄撇的語言
一句一句
斟酌
風的心情

3.

親像悲傷的過程
時間消散袂離
記持一痕一痕
毋敢
落空逝⁸

⁸ 落空逝：iàu-khang-tsuā，白走一趟。

4.

遠遠的所在
有戰爭的鬪洗
欲來
無張持⁹

近近的所在
有和平的拆白¹⁰
欲去
無相辭

5.

若像躡絞尾的寂寞
毋敢予人知影

若像目一矚的稀微
礙虐¹¹講袂出喙

若像魂魄塞鼻
心事鬱卒歹透氣

若像靈魂臭耳聾
聽無世間冷暖的代誌

6.

⁹ 無張持：bô-tiunn-tî，突然、冷不防。

¹⁰ 拆白：thiah-péh，挑明。

¹¹ 礙虐：gāi-giòh，彆扭、不順，令人覺得不舒服。

按算欲繼續戮空¹²

飽穗的元氣

繼續懷疑

躊躇的代誌……

按算欲繼續損蕩¹³

慣勢的吩咐

繼續糟躑

家己的青春……

按算欲按怎

將失神的面腔提提掉

將落魄的人生

吞落喉的時陣……

想袂到有雨聲

規日規暝

漚漚滴……

位天邊滴到我的目矚前

位我的目矚前

滴入去心肝內

位心肝內繼續

漚漚滴……

規日……

規暝……

是毋是猶有故事講袂煞？

是毋是猶有燒烙的笑容

溫暖記持？是毋是猶有

心肝內落袂停的雨聲

漚漚滴……

¹² 戮空：lak-khang，鑽孔、穿洞。

¹³ 損蕩：sng-tñg，破壞、糟蹋。

拋荒的情批

1.你的目矚

你的目矚 有雨
無緣無故開始落
親像田嬰長長的翼股
飛佇故鄉田岸的水路
一下晡
攏是稀微的思慕

你的目矚 有火
不管時微微仔燒
親像虎頭蜂無情的刺針
叮著我戇戇的頭殼
日時暗暝
陣陣的痠疼

你的目矚 有星
下昏暗閃閃爍爍
親像火金姑颺颺飛
飛去無人的世界
家已咧跳舞

你的目矚 有月
現此時安安靜靜
一目矚煞無看見
親像無講無坦就失蹤的暗光鳥
放我一个人踮遮，繼續等待——
天，光

2.你的跣步聲佻我的白頭毛

你的跣步聲
是我三更半暝陷眠的原因
躊躇的形影佻秋天的目神
敢若是熟似的月光
夜夜陪伴
這頂
冷清的紅眠床

我的白頭毛
是你年久月深油漆的緣故
沉重的靈魂佻放浪的心情
袂輸是生份的家己
日日等待
有一工
當面
閣再叫著你的名

3.你的眠夢

所致，你的眠夢
誠有可能存在
百百款
無全款的色水

若毋是心內的窗仔門
關緬緬¹⁴
外口，光佻影搬演的戲齣
哪會感覺
靜悄靜悄

¹⁴ 緬：ân，緊。嚴密，不放鬆。

若毋是現此時
落著霎霎仔雨
過往的情景
哪會親像山頂的霧霧
沓沓仔炭開
我的心事

毋管是驚惶的跔步
或者是冷靜的手路
攏應該閩縫
走揣另外一種
焔印佇記持中的
心聲

所致，誠有可能
你的眠夢
存在百百款
無全款的色水

四季

1. 春天面色

櫛仔外 鳥聲
歡喜走江湖

東風 使目尾
花蕊微微仔笑

雲尪做伙 飄撇
明仔載繼續流浪

愛情啊 青春
綿死綿爛¹⁵

2. 熱天發癢

生活 傷¹⁶焦燥
日頭喙焦

中晝 哈唏
心情暍袂去

風景貧瘠
遊覽 小歇暍

代誌中間
應該 啲一杯茶

¹⁵ 綿死綿爛：mî-sí-mî-nuā，死心塌地，堅持到底。

¹⁶ 傷：siunn，太。

3.秋天界址

焦黃的喘氣聲
是草埔的 風

烏趨趨的暗暝
是時間的 湧

思念的配色
是曠闊的 海

雞啼進前
是驚惶的 夢

4.寒天祕密

愛情寄付的 誓言
有人毋敢拍開

孤單老人的 尾站
親像磅空無日頭

病疼的 折磨
無張持就聳鬚¹⁷

生疏的 日常
日日搬演熟似的角色

¹⁷ 聳鬚：tshàng-tshiu，鬚鬚聳起來或蓬亂。引申為囂張、逞威風。

我會記得

我會記得 十六份
這個舊地名
有熟似的形影
位磅空彼頭 做伙
行來 青春這搭

無疑誤
是愛情的美麗
保留這段
拋荒的老車站

我會記得 三義
彼个下晡
你講我是欠人開破的
柴頭尪仔
感情像粗坯
心思無夠幼路

彼陣 小可仔有雨
滴落這條必巡¹⁸的山路
我這副重重厚厚的目鏡
安怎攏看袂清楚
你這尊
觀音的面腔

我會記得 南庄
彼个暗暝
火金姑飛來山跤
走揣童年

¹⁸ 必巡：pit-sûn，龜裂。

囡仔陣的喝咻聲
佢我的目睭相閃身
一越頭
只有油桐的花影
佇山坪
微微仔笑

笑聲招來月娘婆
月光炤入門窗
佢我做伴 看你
看你的長頭髮 像溪水
慢慢仔流入我的心肝內
唱歌

海湧

繼續行

只有海湧的聲
毋知是咧唱歌
抑是咧講話

早起的天
佢雲

漁港的人
佢船

斷枝斷節的水流柴
佢我

有時是想著較早
有時是想欲袂記得過去

心內的海湧
嘛咧講話
嘛咧唱歌

想欲挽回的故事
想無清楚的代誌
比這片大海閣較開闊

繼續慢慢仔想
繼續行

毋通停跤

暗光鳥

暗光鳥愛寫詩

伊有一支神祕的鎖匙

若是月娘睏袂去

孤單一个

行到遠遠的天邊

伊就暗暗仔拍開靈魂的鎖頭

展開翼股放膽飛

飛去全世界上懸上懸的樹尾

變做一粒星

陪伴天頂彼蕊含水的目矚

透暝

相思

暗光鳥愛寫詩

伊愛落雨的暗暝

家己倚踎簾簷跤恬恬仔聽

聽沓沓滴滴的雨水

按怎唱出放冗¹⁹性命的歌聲

按怎啞出心內揜貼²⁰的代誌

按怎霧²¹出一字閣一字

詩句的珠淚

按怎傍這杯烏咖啡的苦味

濟少來安慰青春的時陣

彼段糖甘蜜甜

失蹤的記持

暗光鳥愛寫詩

¹⁹ 放冗：pàng-līng，放寬、放鬆。

²⁰ 揜貼：iap-thiap，形容一個地方人煙罕至，或者較為隱密。

²¹ 霧：bū，指口中先含液體再將其噴出。

有時日子拖棚閣死趯²²
思路頓躑²³袂輸是斷槓的樹枝
伊講彼時
靈感是一坵拋荒的田園
一粒果子都無生
好佳哉一隻貓咪笑微微
無聲無說行過來伊趯邊
不止仔溫柔體貼的心意
直直擦抵²⁴

有人問伊：為啥物寫詩？
何乜苦創治家己？暗光鳥無要意
三更半暝，安安靜靜
恰一葩電火做伙
伊相信：若是有一日
性命焦薦，親像葉仔倚黃
墜落塗……
死——
嘛是一種值得囂俳²⁵的嬌氣

²² 死趯：sí-sô，動作遲鈍不活潑，做事情慢吞吞。

²³ 頓躑：tùn-tenn，暫停腳步、暫時停頓。

²⁴ 擦抵：ngiau-ti，用手指搔人腋下或腰部使人發癢。

²⁵ 囂俳：hiau-pai，囂張。

時間

所以，時間是按呢
毋捌騙過人
拍損的彼日
無可能閣相會

毋過，時間嘛按呢
無講無咀
行對頭前去
一寡記持，恬恬仔
园佇心內

所以，咱是按呢
目矚金金
看鏡中的頭髮
無聲無說，變作
山頂的白霧

毋過，咱嘛按呢
耳空重重
胸坎實實²⁶
據在²⁷時間一直來
一直來創治²⁸

²⁶ 實實：tsát-tsát，裝滿、塞滿的樣子。

²⁷ 據在：kì-tsāi，任由、任憑。

²⁸ 創治：tshòng-tī，捉弄、欺負。

所在

所在
發生真濟代誌
無疑悟
南方的你
愛寫詩

你講：所在
若是親像大海這陣
恬靜恬靜
人生就毋免閣妝奩²⁹

你講：所在
若是親像山崙這般
青龍龍
心情
自然就轉斡
跛步
自然就押韻

所在
雖罔干焦一粒星閃爍
我想，你袂講伊稀微
因為有光的所在
就有意志

你永遠佇遮
佇這個所在
親像庄跛孤一間的冊店
存在的理由

²⁹ 妝奩：tsng-thānn，化妝、打扮。

就是飄撇的勇氣

順你的目矚看過去

河溪已經橫袂³⁰佇天穹³¹

是三更？抑是半暝？

你，猶原

佇這個所在

繼續寫詩

³⁰ 袂：phuáh，披、掛。

³¹ 天穹：thinn-kiong，天空。